

KONTROL MOZIOA

MUNDUKO FUTBOL TXAPELKETA DONOSTIAKO TURISMO-POLITIKAREKIN DOITZEKO BALIZKO AUKEREI BURUZKOA

Jon Markel Ormazabal Gaztañagak, EH BILDU udal taldeko zinegotziak, Udalbatzaren Organo Araudiko 98. artikulua oinarri, mozio hau aurkezten du, Udalbatzan azter dadin. Mozioa 2025eko martxoko Pertsonentzako Zerbitzuen Batzordean aztertutako interpelazioaren ondorioa da.

JUSTIFIKAZIOA

2024ko abenduan baieztatu zen Donostia 2030eko munduko futbol txapelketaren egoitzetako bat izango dela. "San Sebastián alcanza este hito de enorme importancia tras una larga carrera en la que diversas ciudades han peleado por ser sede mundialista", irakur zitekeen Donostia Kirola Erakunde Autonomoaren webgunean. Ildo beretik mintzatu zen Kiroletako zinegotzi Iñaki Gabarain Udalaren webgunean: "Benetako mugarria da Donostiako kirolarentzat eta gure hiri osoarentzat (...) eta Donostiak lortu du Realak eta erakundeek elkarrekin egindako lan bikainari esker, Udala buru dela".

Esan beharrik ez dago nolako jendetza mugitzen duen lehiaketa honek, munduko kirol-ekitaldi turistiko handiena bihurtu dena. Hori horrela izanik, ezinbestekoa da albistea hiriak bizi duen testuinguruan kokatzea. Izan ere, Donostiako Udalak 2023-2027 aldirako onartutako Turismo Planak argi adierazten du "sustapen masibotik aldendu" behar dela, helburua ez baita "bisitari kopurua handitzen jarraitzea", eta donostiarren gehiengoa iritzi berekoa da. Aipatu plana ontzeko, turismoak Donostian duen eraginaren diagnostiko bat egin zuen *Ikertalde* ikerketa taldeak, udalak berak eskatuta. Azterlan horren emaitzak 2023an aurkeztu ziren, eta, orduan, donostiarren % 65ek uste zuten hirian "turismo saturazio handia" zegoela, hau da, bisitarien kopuruak goia jo zuela Donostian. Urtebete geroago, 2024ko irailean, *Datakey Institutuak* Estrategia Bulegoaren eskariz egindako

Herritarren Pertzepzioari buruzko Inkestaren emaitzak ezagutu genituen, eta bertan, besteak beste, donostiarren % 82,3k adierazi zuen Donostia mugara iritsia zela turismoa erakartzeko orduan.

Donostia 2030erako Munduko Txapelketaren egoitzetako bat izateak, beraz, talka egiten du indarrean dagoen turismo-planaren helburuekin.

Planaren helburua turismo-eredu jasangarri bat garatzea da, eta, horretarako, azpimarratzen du lehentasuna ez dela bisitari kopurua, kalitatea baizik. Baina planak berak adierazten duen bezala, ez dago kalitatezko turismorik helmugako baliabideen erabilera turistikoa ondo araututa ez badago, espazio publikoari eta ostatuari aipamen berezia eginez. Bada, turismo-ostatuei dagokionez, ostatatze-eskaintza arautzea da planak nabarmentzen duena, “denak ez baitu balio”. Eta eskaintza hori arautzeko neurriak, hartu bai, batzuk hartu dira. Adibidez, hiriko eremu berriak hotelez saturatutzat joko dituen Plan Orokorren aldaketa, baldin eta turismo-ostatuek eremu horretako etxebizitza-eskaintza osoaren ehuneko jakin bat gainditzen badute. Eta saturazio edo mugaketa hori justifikatu da 100 biztanleko 10 plaza turistikoren indizea gainditzen duenean. Bada, adierazle honen arabera, 2024an Donostia osoko batez bestekoa 9,91 turismo-plaza da 100 biztanleko.

Eta hona hemen kezka.Nazioarteko Futbol Federazioak (FIFA) hautagai-zerrendari buruzko txosten bat eman zuen ezagutzera, proposatutako egoitza bakoitzaren egokitasuna zehatz-mehatz ebaluatuz. Bada, hamazazpi hautagaien artean, Donostia da ostatatzeari dagokionez puntuaziorik txarrena lortu duen hiria, gaur egun Donostian dagoen ostatu-plaza kopurua “ez dela nahikoa izango” ohartaraziz. Hau da, antolatzaileek aurreikusi dute ekitaldiak Donostiaren ostatu-ahalmena gaindituko duela. Kontua da ostatatzea arautzeko Udal Gobernua gaur-gaurkoz bultzatzen ari den ekimenek ez dutela ziurtatzen gaurtik 2030era hirian turismo-ostatu berririk egongo ez denik, eta, beraz, FIFAre txostenaren errekerimenduari kasu eginez gero, Plan Orokorren azken aldaketan proposatutako eragin-indizea gainditzeko arriskua dagoela.

Horregatik guztiarengatik, honako hau da behean sinatzen duen zinegotziak aurkeztutako **KONTROL MOZIOA:**



EH Bildu talde politikoa
Grupo político EH Bildu



Ijentea, 1 - 20003 Donostia
Tel. 943481027 eh_bildu@donostia.eus-- www.donostia.ehbildu.eus -

1.- Donostiako Udalbatzak hertsatuki eskatzen dio Udal Gobernuari, ostatuei buruzko Donostiako Hiri Antolamenduko Plan Orokorren aldaketan jasotako adierazlea kontutan hartuta, berretsi dezala eragin-indize hori ez gainditzeko konpromisoa.

Donostian, 2025eko martxoaren 21ean

Jon Markel Ormazabal Gaztañaga

EH Bildu udal taldeko zinegotzia